

4 NOVEMBRE

(data Storica e un Caro Ricordo !)

Data storica che ricorda 'na vittoria
Che la g'ha minga avù fortuna 'n la nostra storia
L'è putost pasada come memoria
De la "grande guerra" coi so sfracell
Per tanta gioventù on gran macell!
Milion de mort, de chi e de là
In di trincee e i assalti; 'sti por soldà!
Per cosè, poeu, per on toc de tera
De conquistà fasendos guera.
L' "inutil strage" 'l diseva 'l Papa che gh'era allora
Ma domà adess ghe demm rason: a la bon'ora!

L'ha combatu anca 'l me papà
Ma lu i so oss, almen, i ha portà a ca!
Cont'ona medaieta de bronz, al valor,
Che lu 'l portava orgoglios e con onor.
E tuti i an, quand gh'era 'l corteo di combatent
El marciava con la sua medaia tutt content.

Car el me papà; l'è propi mort
(In del dispiasé: che bela sort!)
El quater november intant che pasava
Sota i finester la banda che la sonava
La canzon del Piave. E lu 'l gh'è andà adré
E, som sicur, anca lu 'l cantava!

(ricordo a 60 anni dalla morte di mio padre)

da Don Arnaldo

